

Ես դուրս եկայ իմ բանտից, ես թողեցի դպրոցը – իմ մանկութեան, իմ տանջանքների «դժոխքը» – եւ միւս անգամ չվերադարձայ այնտեղ...

Ը. ՀԻՆ ԸՆԿԵՐՆԵՐ

Ազատելով իմ բանտից, ես վճռեցի միւս անգամ չվերադառնալ այնտեղ, եւ ոչ մեր տունը գնացի, որովհետեւ գիտէի, որ մայրս առաւօտեան կրկին ինձ կը տանէր տերտերի մօտ, եւ յանձնելով նրան, կասէր. – «միսը քեզ, ոսկորը ինձ»... Բայց ես այժմ հասկացել էի այդ սարսափելի խօսքի նշանակութիւնը, որ մայրս առաջին անգամ ինձ դպրոց տալու ժամանակ ասաց վարժապետիս:

Գիշեր էր, երբ ես դուրս եկայ բանտից. չգիտէի, թէ ուր գնամ: Յուսահատութիւնը մինչ այն աստիճան տիրել էր ինձ, որ մտածում էի. «Էլ ուրիշ ճար չկայ, գնամ գետն ընկնեմ, գուլցէ ազատեմ»...

Խորին վրոդովմունքի մէջ ես անցայ մեր ամբողջ թաղը. փողոցների մէջ ոչ ոք չէր երեւում. դէպի ամէն կողմ տիրում էր խուլ լռութիւն: Ամէն ընտանիք, եկեղեցուց տուն դառնալով, ուրախ, զոարթ, բոլորել էր զատկական սեղանի շուրջը եւ ընթրիք էր վայելում: Բայց ես, որպէս փախստական, որպէս մի թշուառ դատապարտեալ, տեղ եւ օթեան չունէի այս գիշեր: Տներից բուրում էր ինկի եւ կը նդրակի անուշահոտութիւնը. ամբողջ օդը լցած էր այդ սրբազան բուրմունքով: Երբեմն իմ ականջին զարկում էին ուրախ բացականչութիւններ. «Քրիստոս յարեաւ ի մեռելոց»... այո՛, յարեա՛ւ սիրոյ եւ խաղաղութեան աստուածը... Բայց որտե՞ղ էր սերը, որտե՞ղ էր խաղաղութիւնը, որտե՞ղ էր եղբայրութիւնը, – ես իմ կեանքի մէջ այդ բաները ոչ մի տեղ չէի տեսել...

Իմ խռովութիւնը այժմ հասնում էր մինչեւ խելագարութեան... Ես այժմ ոչինչ չէի լսում, ոչինչ չէի զգում: Ինձ մինչեւ անգամ անհասկանալի էին քաղցրաձայն տաղերգութիւնները, որ հնչում էին այս եւ այն տան լուսամուտներից: Կարծես ամբողջ աշխարհը խլացել էր ինձ համար: Թէ ինչպե՞ս յայտնեցայ գետի ափի մօտ, – մինչեւ այսօր չգիտեմ, միայն յիշում եմ, երբ ես պատրաստում էի ընկնել գետի զարնան հեղեղներից յորդացած ալիքների մէջ, ինձ կանգնեցրեց մի ձայն.

– Է՛յ, ի՞նչ ես անում:

Մի կողմից գիշերային մթութիւնը, միւս կողմից իմ խռովութիւնը, թոյլ չտոհն իսկոյն ճանաչել նրան, բայց ինձ երեւաց, որ ձայնը բոլորովին ծանօթ էր: